



Sermon  
Kxf. Dr. Numlaajtsheb Yaaj

“Vajtswv Hu Koj”

Second Sunday after the Epiphany  
Our Savior Lutheran Church  
1-15-2023

Thov txoj koobhmoov, txojkev hlub, thiab txojkev haumxeeb pub rau nej sawvdaws los ntawm Vajtswv uas yog peb Leejtxiv uas yog peb tus Cawmseej Tswv Yexus Khetos. Asmees.

**1 Kauleethaus 1:9**, “God is faithful, who has called you into fellowship with his Son, Jesus Christ our Lord – *Vajtswv yog tus ncajncees, Vajtswv thiaj hu nej los nrog nws tus Tub Yexus Khetos uas yog peb tus Tswv sib raug zoo.*” Nov yog Vajtswv Txojlus (Cross-reference – Kevcai 7:9, Yaxayas 49:7, Loos 8:28, 30, 1 Kauleethaus 10:13, 2 Kauleethaus 1:18, 1 Thexalaunikes 5:24)

**Illustration** “Important” (Show people talking on telephone)



Ib yam tseemcee uas tibneeg tsim tau yog lub “telephone - xovtooj” uas peb siv los tham thiab ua dejnum ntau yam nyob rau hauv peb lub neej. Tiamsis ntau zaug peb yuav tsis nyiam thaum lwmtus pheej hu losyog xa xovxwm tuaj tabkaum peb. Thaum lwmtus hu tuaj tabkaum peb yog thaum peb lub “telephone - xovtooj” nrov rau lub sijhawm uas peb tseem pws, tseem noj mov, losyog thaum yus tseem muaj lus tseemcee nrog lwmtus tham. Tiamsis yog thaum twg koj xav hu rau lwmtus mas lub xovtooj yog yam uas tseemcee heev rau koj tus kheej. Yog koj xav hu rau koj tus phoojywg, hu koj tus txheeb

tus ze, hu koj cov menyuam, thiab hu kom tibneeg tuaj xyuas koj losyog koj yuav mus xyua lawv losyog koj muaj lus zoo xav nrog lawv tham mas koj tos tsis tau yuav rawm hu xovtooj mus qhia lawv paub. Tiamno, peb tsua pom tibneeg yeej nyob tsis tau yog lawv tsis hu nrog lwmtus tham losyog text lwmtus.


I. Cov kwvtij hlub thiab movtshua, yog haistias Vajtswv siv lub xovtooj hu rau koj, koj puas yuav teb los tsis teb. (Show God Calling)



Yog koj teb es Vajtswv haistias, “Hello this is God – *Nyob zoo nov yog Vajtswv*” koj yuav ceeb losyog yuav zoo siab heev. Yog haistias, Vajtswv haistias, “Kuv xav ntsib koj, qhia Txojmoozoo rau koj, caws koj los rau hauv Vajtswv lub tsev” koj yuav teb Vajtswv li cas? Tejzaum nej ibtxhia yuav ntshai thiab nej ibtxhia yuav zoo siab heev. Tiamsis koj yeej paub lawm haistias, Vajtswv yuav tsis hu xovtooj rau koj. Qhov tseeb tiag Vajtswv yeej hu peb txhua leej txhuatus lawm. Nws hu xovtooj rau peb los ntawm Nws Txojmoozoo uas yog Vajtswv phau Vajluskub uas yog Txojlus Dawbhuv. Nws txojlus qhia kom peb ntseeg thiab cia siab rau Yexus Khetos

peb thiaj li tau txojhia mus ibtxhis. Thaum peb tseem ua neej nyob Nws thiaj li hais kom peb pab ua Nws tes dejnum thiab tsis ntev Nws yuav rov los coj peb mus nrog Nws nyob saum ntuj ceebtsheej uas yog tau txojhia mus ibtxhis. Nws caws kom koj tuaj hawm nws hauv Nws lub tuamtsev dawbhuv. Hauv Nws lub tuamtsev Nws pub txojkev zamtxim rau koj thiab txhawb kom koj txawj ua lub neej haum Vajtswv dejsiab.

(Show Preach the Word)



Yog koj ua tibzoo saib, Vajtswv Txojlus zoo nkaus li thaum peb txais nkaus lub xovtooj vim Txojlus tabtom nrog koj tham. Yog li ntawd, tus Thwjtim Paulus tsabntawv hhubno sau rau haiv tibneeg Kauleethaus qhia kom lawv thiab peb cov ntseeg tiam tamsimno paub txog tias Vajtswv hu peb los qhia txog Yexus Khetos txojkev cawmdim rau lwmtus.

(Show the Apostle Paul conversion)



Tus Thwjtim Paulus raug hu los ntawm Vajtswv los mus ua Vajtswv tes dejnum ntawm txojkev Damuxes. Paulus thiaj li hais ntawm Vs. 1 “Paul, called to be an apostle of Christ Jesus by the will of God ... - *Kuv yog Paulus tus uas Vajtswv hu los ua Yexus Khetos tus thwjtim raws li Vajtswv lub siab nyiam...*” (1 Kauleethaus 1:1) Yog peb ua tibzoo saib nov zoo nkaus li thaum Vajtswv hu Paulus, Paulus txais nkaus lub xovtooj mloog saib Vajtswv yuav kom Paulus mus ua dabtsi. Vajtswv txib kom Paulus los ua Yexus tus thwjtim thiab kom Paulus mus qhia Txojmoozoo rau tibneeg. (Show people praying at meeting of calling a pastor)




Thaum twg pawgntseeg los sibtham txog saib lawv yuav hu tus xibhwb zoo li cas los rau pawgntseeg. Vajtswv nrog rau pawgntseeg hu xibhwb los mus ua nws tes dejnum rau Vajtswv haiv tibneeg. Nov peb hu tias “Divine call - Vajtswv lub hwjchim hu” uas yog Vajntsujplig Dawbhuv nrog rau Pawgntseeg hu tus xibhwb los rau nws koj thiab qhia Vajtswv haivneeg. Yog li ntawd pawgntseeg thiaj li thov kom Vajntsujplig Dawbhuv pab koj lawv txojkev uas hu xibhwb los rau pawgntseeg. Tibneeg yuav saib tus xibhwb uas lawv

xaiv ntawd saib puas yuav zoo, ntxim, thiab phim rau pawgntseeg. Tiamsis Vajtswv yog tus xaiv thiab Vajtswv yog tus hu tus paub tias pawgntseeg yuavtsum tau tus xibhwb zoo li cas los ua nws tes dejnum qhia txog Yexus Khetos txojkev cawmdim. (Show Pastor & Members)




Thaum Vajtswv hu xibhwb los rau pawgntseeg yog Vajtswv xav kom pawgntseeg thiab xibhwb sib pab ua dejnum qhia Vajtswv Txojmoozoo kom pawgntseeg txawj lojhlob, huamvam thiab vammeej zuzus. Yog pawgntseeg tsis pom lub homphiaj uas Vajtswv hu xibhwb thiab pawgntseeg ces pawgntseeg yuav tsis lojhlob thiab yuav tsis vammeej vim lawv tsis ua Vajtswv tes dejnum.

II. Vs. 2 Paulus sau haistias, (Show Paul letter to the Church at Corinth)



“To the church of God in Corinth, to those sanctified in Christ Jesus and called to be his holy people, together with all those everywhere who call on the name of our Lord Jesus Christ—their Lord and ours: - *Rau cov ntseeg Vajtswv uas nyob hauv lub nroog Kauleethaus, txhuatus uas Vajtswv hu los ua Vajtswv haivneeg thiab tej tibneeg uas nyob txhua qhov chaw uas pehawm peb tus Tswv Yexus Khetos uas yog lawv thiab peb tus Tswv:*” (1 Kauleethaus 1:2) Nov yog Vajtswv hu cov ntseeg hauv pawgntseeg los ua kwvtij kwvnpawg. Nws hu txhuatus los ua Vajtswv cov tubtxib. Yog li ntawd, peb yog Vajtswv cov tubtxib lawm, peb yuavtsum tau ua lub neej dawbhuv

kom haum Vajtswv dejsiab. Feem ntau peb cov ntseeg ua lub neej dawbhuv tsis tau vim peb tsis mloog Vajtswv tej lus qhuab qhia. Thaum peb ua tsis tau lawm, peb twb tsis hu xovtooj (thov) rau Vajtswv kom Vajtswv pab peb txawj ua lub neej. (Show Christian at Corinth)



Tiamsis Vajtswv yog tus hu koj thiab hais rau koj tias: “I always thank my God for you because of his grace given you in Christ Jesus. For in him you have been enriched in every way—with all kinds of speech and with all knowledge— God thus confirming our testimony about Christ among you. Therefore you do not lack any spiritual gift as you eagerly wait for our Lord Jesus Christ to be revealed. He will also keep you firm to the end, so that you will be blameless on the day of our Lord Jesus Christ. God is faithful, who has called you into fellowship with his Son, Jesus Christ our Lord – *Kuv niaj*

*hnuv ua kuv tus Vajtswv tsaug, rau qhov Vajtswv pub Vajtswv txoj koobhmoov rau nej cov uas ntseeg Yexus Khetos lawm. Yexus Khetos ua rau nej muaj txhuayam, tsis hais tej lus uas nej hais thiab tej kev txawjntse uas nej muaj. Qhov ntawd yog qhov uas ua rau nej ua timkhawv qhia txog Yexus Khetos zaj. Yog li ntawd, thaum uas nej tabtom tos peb tus Tswv Yexus Khetos rov qab los nej thiaj tau koobhmoov, tsis muaj ib yam uas nej yuav tsis tau li. Vajtswv yuav pab kom nej muab siab rau ntseeg mus txog hnuv kawg, yog li ntawd hnuv uas peb tus Tswv Yexus rov qab los, nej thiaj tsis muaj ib qho txhaum li. Vajtswv yog tus ncaincees; Vajtswv thiaj hu nej los nrog nws tus Tub Yexus Khetos uas yog peb tus Tswv sib raug zoo.” (1 Kaulethaus 1:4-9). (Show be a light)*

III. Yog li ntawd, Vajtsw hu koj los mus qhia Yexus Khetos Txojmoozoo cawm tibneeg txojtia.



Vajtswv twb pub koobhmoov rau nej txhuatus los mus ua Vajtswv tes dejnum. Koj cia li mus ua lub teeb ci rau cov tseem nyob rau txojkev tsaus ntuj nti. Koj tsis txhob tos, sawv kiag mus qhia lwmtus kom lawv hnov Txojmoozoo. Thaum lawv hnov lawm, Vajtswv mam li hu tus ntawd los ntseeg Yexus Khetos. (Show God’s calling you)



Tiamsis ntau zaug peb tsis muaj cuabkav los mus qhia txog Yexus rau lwmtus li. Muaj ib tus txivneej nws ua haujlwm nrog nws tus phoojywg tau ob lub xyoo. Thaum nws qhia nws tus phoojywg tias nws yog tus ntseeg Vajtswv nws tus phoojywg teb haistias, “Kuv paub koj ntev tag npaum li no es ua li cas koj tsis qhia rau kuv txog koj txojkev ntseeg.” Peb xav tias peb yog tus ntseeg Vajtswv tiamsis peb twb tsis lees los ntawm peb lub qhovncauj tias peb

txojkev sib raug zoo nrog Vajtswv zoo li cas. Peb yuavtsum nco ntsoov tias Vajtswv hu koj, koj puas yuav teb nws? Cia li los ua nws tsevneeg, los ua nws tus menyuam, los ua nws tus thwjtim thiab mus qhia Yexus Khetos rau lwmtus kom lwmtus thiaj li yuav hnov thiab teb thaum Vajtswv hu lawv. (Show Send Me)



Vajntsujpllig Dawbhuv hu nej los kom nej tau txojkev kajsiaib lug hauv nej lub neej. Yog li ntawd, cia peb txhua leej txhuatus hnov Vajtswv lo lus thaum nws hu peb txhua hnuv hauv peb lub neej los ua nws tes dejnum. Thov kom Vajntsujplig Dawbhuv pub peb yuav teb tau tias, “Here I am Lord, send me – *Kuv nyob ntawm no tus Tswv, txib kuv mus.*” (Yaxayas 6:8) Kuv yuav mus qhia Yexus Khetos zaj. Asmees. Thov kom Vajtswv Txojlus pub rau peb sawvdaws totaub thiab tau nyob kajsiaib lug rau ntawm Tswv Yexus Khetos lub npe. Peb txhuatus uas yog Vajtswv cov menyuam peb sawvdaws hais: Asmees